

La Lettre Jèrriaise, lé 23 d'Janvyi 2021.

Bouônjour bouons gens. Ch'est Françouais L'Maistre tch'a l'pliaîsi dé vos présenter la Lettre Jèrriaise à matîn, Sanm'di lé 23 d' Janvyi 2021. Bouistre, eune autre nouvelle année. Faut éspéther qué ch't' année ess'sa miyeuthe qué l'année passée.

Ch'est acouo eune tchuthieuse situâtion qué j'avons chu fichu virus par les c'mîns et i' pathait qué ch'est bein piéthe en Angliétère auve la nouvelle vâriâtion dé chu virus. Faut éspéther qué nous pouorra aver des vacances pus tard ch't' année et qué les docteurs et nocés éthont la chance dé lus r'poser auprès lus superbe travas à souongni des siens tch'ont 'tait malade.

J'ai 'tait bein chanceux qué seulement qu'un membre dé ma fanmil'ye ont attrapé lé virus; oulle est étudgiante à L'Univèrsité à Londres, et ou' sé r'fis bein vite. Toutes les étudgiantes dê ma fanmil'ye sont siez ieux pour lé moment, à cause du virus et qué les Univèrsités sont freunmés, mais i' faut tchi payent pour lus loyer la même chose, comme dévant. Ch'est tout a fait riditchule.

À ch't' heu qué j'sommes dans l'mitan d'l' hivé, j'ai èrmèrtchi qué j'avons bein mains d'ouaîselîn par les c'mîns, qué j'avions au S'tembre. J'mé d'mande si ch'est qu'la froid au mais d' Dèzembre 'tait trop duthe pour un tas des p'tits ouaîsieaux, car j'avais eune racachie d'mouosons duthant l'Été et duthant lé S'tembre, mais à ch't' heu, j'n'ai qu'eune d'mié douzaine tchi veinent mangi d'la graine dans les dgichons dans l'bel. Duthant la s'maine, j'restis eune volée duthant l'heuthe du dîner a seurvilyi les dgichons et j'comptis deux mouosons, deux pigeons et deux tourterelles, et pis pus tard, un p'tit raité. Tchi bonheu! Mais, rein d'autre. Ch'est l'Hivé. Lé Bouôlias dans l'bel est tout nu, ouaithe qu'au c'menchement d' Dèzembre, j'avions acouo des vèrtes fielles sus l'bouais. Les tempéthatuthes 'taient acouo 10 à 12 degrés, mais tout d'un coup, 2 degrés à mèjeu lé 4 dé Dèzembre !!

V'la tchi du chotchi l'ouâselîn, pa'ce qué, i'y en' avait bein mains auprès ch'na.

Pas grands autres nouvelles. J'n'ai pon veut ma fanmil'ye en Angliètèrre pour pus qué 18 mais, mais ch'est la même chose pour tout l'monde. J'sis bein content qué nous peut faithe sèrvi Zoom aue l'ordinateu, car j'lé fais sèrvi rédguliéthement pour pâler à la fanmil'ye hors payi, et nos réunions toutes les s'maines en Jèrri aue les difféthents Conmité.

Mais, ch'est d'sappointant d'né pouver pon aller â l'Églyise acouo et nous manque l'amiètchi dé ses anmîns et les Sèrvices ensembl'ye. Nous vit en éspéthance !

Ayiz tous en bouonne sémaine et restez sains et sauf.

À bi.